

इवनिंग डोगरी न्यूज बुलेटिन

समे .18:15 Hrs

<><><><><><>

### Headlines

1. एल.जी मनोज सिन्हा होरें आतंकवाद कन्नै पीड़ित परोआरें दे सदस्यें गी 158 नियुक्ति पत्र सौंपे।
2. समाज कल्याण मंत्री सकीना इतू होरें पुंछ च सेहत, समाज कल्याण ते शिक्षा मैहकमें दे कम्मकाज दी समीक्षा कीती।
3. जम्मू-कश्मीर थमां दफा 370 गी हटाए जाने दे 6 बरें पूरे। ढांचागत विकास, सैलसफा च नमीं लैहर दिक्खने गी लब्बै करदी ऐ।
4. जम्मू-कश्मीर सरकार ने 14 अफसरें दे तबादले दा हुकम जारी कीता। डी.सी ते सचिव स्तर उप्पर बड्डे बदलाव।
5. जम्मू सैलसफा मैहकमे नै हैरीटेज सर्कट गी शुरू कीता ऐ जेदे च सैलानिएं गी भीमगढ़ किला, अमर मैहल ते होर बी थाहरां दस्सियां जाडन। एहदे कन्नै विरासती सैलसफा ते सांस्कृतिक विरासत गी बढ़ावा देने दा मकसद ऐ।

<><><><><><>

### LG-App Letters

उपराज्यपाल मनोज सिन्हा होरें अज्ज श्रीनगर दे शेर-कश्मीर अंतरराष्ट्री कन्वेंशन सेंटर च आतंकवाद कन्नै पीड़ित परोआरें दे सदस्यें गी 158 नियुक्ति पत्र सौंपे। इस मौके पर एल.जी होरें पीड़ित परोआरें कन्नै गल्लबात कीती ते उनेंगी प्रशासन आसेआ उंदी भलाई ते पुनर्वास लेई लगातार प्रतिबद्धता दा भरोसा दिता। इस मौके पर बोलदे होई एल.जी होरें आपरेशन महादेव ते आपरेशन सिंदूर बारें लोस पाई। उनें आखेआ।

इस कार्यक्रम दा मकसद आतंकवाद सरबंधी घटनाएं च अपने प्रियजनें गी खोने आहले परोआरें गी समर्थन देना हा ते उन्दे परोआर दे योग्य सदस्यें गी सरकारी रोजगार देना हा।

<><><><><><>

समाज कल्याण ते शिक्षा मंत्री सकीना इतू होरें अज्ज पुंछ जिले च सेहत, समाज कल्याण ते शिक्षा मैहकमे दे कम्मकाज दी समीक्षा लेई इक बैठक दी प्रधानता कीती। उनें 28 दिव्यांग लोकें गी Motorized Tricycle बी बंडडे। इस मौके पर मंत्री होरें इनें लोकें लेई सरकार दी प्रतिबद्धता गी जाहिर कीता ते होरनें जिले च बी इस चाल्ती दी पैहलकदमिये लेई योजनाएं दी घोषणा कीती। उनें प्रधानमंत्री मातृ वंदना योजमना दे तैहत इक सिखलाई कार्यक्रम दा बी उद्घाटन कीता जिंदे च महिलाएं लेई बक्ख-बक्ख समाज कल्याण योजनाएं गी उजागर कीता गेआ। इस मौके पर बोलदे होई मंत्री सकीना इतू होरें आखेआ।

<><><><><><>

### Article-370 Anny

जम्मू-कश्मीर थमां दफा 370 ते 35-A गी हटाए जाने दे अज्ज 6 बरे पूरे होई गेन। इस विशेष दर्जे दे हटाए जाने दे बाद जम्मू-कश्मीर च केन्द्र दे ऐसे केई कन्नू बी लागू होई गेदे न, जिन्दे नै इत्थै ढांचागत विकास, सैलसफा, शिक्षा, सेहत सनें हर क्षेत्र च विकास दी इक नमी लैहर दिक्खने गी लब्बै करदी ऐ। बुनियादी अधिकारें कोला महरूम केई समुदायें गी उन्दे अधिकार थहोए न ते उब्बी हून बाकी लोकें आंगर अपने बुनियादी लोकतांत्रिक अधिकारें दा इस्तेमाल करी सका करदे न। सरकार दा आक्खना ऐ जे ओ जम्मू-कश्मीर च स्थाई अमन शांति, तरक्की ते खुशहाली गितै वचनबद्ध ऐ ते लोकें दे सहयोग कन्नै केन्द्र शासित प्रदेश गी सनेहरे भविक्ख आहली बक्खी तेजिया कन्नै अगड़े लेई जाने लेई कोई कोर-कसर नैई छोड़ी जाहग। इस सरबंधे च अज्ज जिला साम्बा दे विजयपुर दे स्वांखा मोड़ च इक कार्यक्रम दा आयोजन कीता गेआ जेदे च जम्मू संभाग थमां वेस्ट पाकिस्तानी रिफ्यूजिये हिस्सा लैता ते इस दिन गी उत्साह कन्नै मनाया। आकाशवाणी कन्नै गल्लबात करदे होई इक वेस्ट पाकिस्तानी रिफ्यूजी नै आखेआ।

<><><><><><>

### Satyapaul-Malik Dies

जम्मू-कश्मीर दे साबका राज्यपाल सत्यपाल मलिक हुंदा लम्मी बमारी दे बाद मंगलवारें 79 ब' रें दी उम्री च काल होई गेआ। अज्ज दपैहरी कोड़ 1 बजे नमीं दिल्ली दे राम मनोहर लोहिया अस्पताल च उनें खीरी साह लैता। मलिक होर अगस्त 2018 थमां अक्टूबर 2019 तगर जम्मू-कश्मीर दे अखीरी गवर्नर रेह। उन्दे गै कार्यकाल दरान अनुच्छेद 370 गी रद्द करी दिता गेआ हा ते 5 अगस्त 2019 गी जम्मू-कश्मीर गी केन्द्र शासित प्रदेश बनाई दिता हा। राष्ट्रपति द्रौपदी मुर्मू ते प्रधानमंत्री नरेंद्र मोदी होरें सत्यपाल मलिक हुंदे निधन पर बसोस जाहिर कीता ऐ।

<><><><><><>

### JK Adm. Reshuffle

इक प्रशासनिक फेरबदल च जम्मू-कश्मीर सरकार नै 10 IAS ते 4 J.K.A.S अफसरें दे तबादले ते postings दा हुकम जारी कीता ऐ। Naveen S L होरें गी डॉ. शाहिद इकबाल चौधरी हुंदे थाहर सिविल

एविएशन दा सचिव बनाई दिता गोआ ऐ जिसलै के अवनी लवासा होर परिवाहन मैहकमें दे सचिव दा प्रभार साम्भडन। श्री माता वैशणो देवी श्राइन बोर्ड दे साबका सी.ई.ओ अंशुल गर्ग होरें गी कश्मीर दा नमां डिविजनल कमिशनर बनाया गोआ ऐ। डी.सी स्तर दे मुख बदलावें च राकेश मिन्हास होर जम्मू दे नमें डी.सी, विकास कुंडल होर J&K Services Selection Board दे प्रधान, राजेश शर्मा होर डी.सी कठुआ ते आयुषी सूदन होर डी.सी साम्बा बनियां न।

<><><><><><>

### Jammu-Tourism-Circuit

विरासती सैलसफा गी बढ़ावा देने लेई जम्मू सैलसु मैहकमे नै रियासी, जम्मू ते साम्बा जिलें च 229.8 किलोमीटर लम्मे इक नमे हैरीटेज सर्कट गी शुरू कीता ऐ। 5एं दिनें दे इस टूर च बाहू किला, सुचेतगढ़ बाईर ते मोहरगढ़ किलो जनेही प्रतिष्ठित थाहरां दस्सियां जाडन। सेलानी ऐतिहासिक अखनूर किले ते अंबारन थाहर पर रातीं रुकियै उथे रौहने दा मजा लेई सकदे न। इस पैहलकदमी च पैहले धार्मिक स्थलें गी दस्सेआ जाग ते मगरा जम्मू दी समृद्ध विरासत दी सैर कराई जाग। एहदे कन्ने पूरे खिते च सैलसफा गी होर बी बढ़ाया जाई सकदा ऐ।

<><><><><><>

### Vehicle-Jammu

जम्मू जिला प्रशासन नै गड्डियें च अवैध तरमीम जां मॉडिफिकेशन पर पाबंदी लाई दिती गई ऐ। जिला मैजिस्ट्रेट सचिन कुमार वैश्य होरें भारतीय नागरिक सुरक्षा संहिता BNSS 2023 दी धारा 163 ते मोटर गड्डियें सरबन्धि कानून दी धारा 52 तैहत इस बारे हुक्म जारी कीता ऐ। एह फैसला ट्रैफिक पुलस आसेया शुरू कीते गेदे इक अभियान दे बाद लैता गया ऐ, जिस दौरान पाया गया हा, जे कैई गड्डियें आहले अपनी मर्जी कन्ने गै गड्डियें च बदलाव ते मोडीफिकेशनां कराई दियां हियां, जिन्दी नियमें तैहत इजाजत नेही ते एह सड़क सुरक्षा दे लिहाज कन्ने खतरा पैदा करदे न।

<><><><><><>

### Land-Records Digitization

रियासी दियां डिप्टी कमिशनर निधि मलिक होरें अडिशनल इंस्पेक्टर जनरल ऑफ रेजिस्ट्रेशन, पंकज गुप्ता हुं दे कन्ने 1995 थमां 2020 तगर रियासी दे रजिस्ट्रार दफतर च जमीन ते जयदाद दे रिकार्डें दे डिजिटलीकरण दा उद्घाटन कीता। एह पैहलकदमी डिजिटल इंडिया लैंड रिकार्ड आधुनिकीकरण कार्यक्रम दा हिस्सा ऐ ते एहदा मकसद रिकार्डें गी राश्ट्री जेनरिक दस्तावेज पंजीकरण प्रणाली कन्ने जोड़ियै पारदर्शिता च सुधार करना ऐ। इस परियोजना दी 2-3 म्हीनें च पूरा होने दी मेद ऐ। डी.सी मलिक होरें इस पैहलकदमी गी महत्वपूर्ण गें दस्सेआ। इस कार्यक्रम च राजस्व मैहकमे ते एन.आई.सी दे अधिकारियें बी हिस्सा लैता।



## Announcement

पैहली अगस्त कोला लेइयै 7 अगस्त तोड़ी चलै करदे स्तन-पान सप्ताह दे सिलसिले च आकाशवाणी दा क्षेत्रीय समाचार एकांश जम्मू कल 6 अगस्त 2025 गी 15एं मिन्टे दी इक विशेष चर्चा प्रसारित करोग। बड्डलै पौने 9 बजे प्रसारत होने आले इस कार्यक्रम च स्हाड़े परौहने होगंन, उपजिला अस्पताल जगटी नगरोटा च, बाल रोग विशेषज्ञ डाक्टर अश्विनी कुमार जेड़े बच्चें लेई माऊ दे दुधै दे महत्वै पर अपने विचार सांझे करगंन। इन्दे नै गल्लबात करगंन स्हाड़ियां न्यूज एंकर श्रुति खजूरिया। एह कार्यक्रम स्हाड़े इस्सै चैनल पर मीडियम वैव 303 मीटर यानी 990 Khtz ते Fm 100.3 Mghtz पर सुनेया जाई सकदा ऐ। चेता रखेयो कल बड्डलै 8 बज्जियै 45 मिन्टै पर।

